

# O LE SULU SAMOA



EKALEZIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

SETEMA 2023

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 29 - website: [www.cccs.org.ws](http://www.cccs.org.ws)

***TOFA! NAOMI TAUTUA AURELIO.***



***OSIGA FEAGAIGA EFKS FOGAPOA***



***Rev. Olive & Maria Samuelu & fanau, Eirenei, Karisi, Antofenia @ EFKS Fogapoa***

# FAASINO UPU

1. O LE LAUGA	2
2. TUSI FAITAU ASO SETEMA	4
3. OSIGA FEAGAIGA EFKS FOGAPOA	5
4. NA O AFIGA E TULEI MAI	6
5. O LE PEROFETA MULIMULI	8
6. O E UA FAI I LAGI FOLAUGA	10
7. ATA O E UA MALILIU	16

## O LE LAUGA

Tusi Faitau: Matiao 20 : 17 – 28

Matua : Mataio 20: 28, “*E pei o le atali'i o le tagata e le'i sau ia ina ia auauna mai tagata ia te ia, a ia auauna atu ia, ma foa'iina atu lona ola e fai ma togiola e sui a'i tagata e toatele.*”

Manatu Autu: **O Ierusalem le aai o osiga taulaga**

O le masina leni o Setema o loo faamanatuina ai le 193 tausaga o le taunuu mai o le talalelei i Samoa talu mai le tausaga 1830. O le vaitau foi o faiga taulaga a le Ekalesia mo ana galuega faamisionare, i le lalolagi ma Samoa. Ua manatu ai e fia faamamafa le olaga faa ositaulaga, o se isi o feau taologologo o le tala o le malo o le Atua, mo ona tagata.

Afai e saili le mafuaaga o le tele o mea leaga e tutupu ia Samoa ma le lalolagi, e tasi lava le tali, o le agasala o le manatu faapito, faaloloto, matape'ape'a, e afua ai le amio le tonu, le fai mea pi'opi'o, faamasinoga le amiotonu, e fai ma ala e tutupu ai le olaga mativa o tagata, e afua ai ona i ai isi toatuga e pei o misa, gaoi, talepe fale, ma isi faigata e tele lava, ua feagai pea ma le lalolagi a le Atua.

O Ierusalem o le aai na maua e Tavita le tupu ma fai ma aai e ositaulaga ai le nuu mo le Atua, aua ua ogatotonu i ai upufai o le malo ma ona tagata, a ua faavae ai foi le malumalu e fai ma faailoga o le Atua nonofo pea ma Isaraelu. E ui o le aai mulimuli ane na faatoilaloina ma faatafunaina, ona o le amioleaga a le nuu, a e sa toe ati a'e. E afio mai Iesu o i ai le aai, peitai o le aai foi lea na saunoa i ai le Alii o faamauiina e tusitala o le tala o lona soifua, e oo mai le aso e malepe ai, ona o le olaga agasala a le nuu.

A o le aai o le osiga taulaga a le tupu ta'uta'ua o Tavita. O le taulaga lea o le tele o lona malosi ma lona ta'uta'ua, na a'ea ai le aai fai mai tagata sa Iepuse, o le aai e leoleo e pipili na tauaso, ona o le malolosi o ona pa, ma lona tulaga a'e gata e le fili. A ua oo mai le tupu, ona a'ea lea ma fai ma nofoaga e ogatotonu i ai le nuu na filifilia e le Atua. O Ierusalem la o le aai o le osiga taulaga a Tavita ina ua avea ma tupu filifilia, ma avea o ia ma tupu ta'uta'ua o le nuu o le Atua, na folafola i ai e faavavau lona nofoalii. Tiga le leaga o isi tupu mulimuli ane o e na tupuga mai ia te ia, a e na tumau pea le afioga a le Atua ia Tavita, ona o lona alofa i le tagata maualuga lona osiga taulaga mo le Atua.

Lea ua faamatala e Mataio le gafa o Iesu e fesootai ma le tupu ta'uta'ua. O lea ua afio mai le Alii, ma foliga i le tala a le tusitala, o lana galuega e faai'u i Ierusalem. Lea ua taula'i nei lana vaai ia Ierusalem le aai, e taunuu i ai lana feau. O lea ua ia ta'u atu i ona soo, faauta o le a tatou o a'e i Ierusalem. A o lea ua manatu le au soo, ma e na mulimuli ia te ia, o le a alu o ia e faatu lona malo i Ierusalem. O se mea ua matua mamao lava ma la latou vaai, o le ala lea o le tutupu o mea e pei ona ta'ua mulimuli ane, o le fia avea ma tagata saofa'i.

O le mea na manatu i ai le au soo uma, a o lea ua faaleo e le tina o le fanau a Sepetaio, ina ia alofa Iesu ma faanofo ana tama, o le tasi i lona itu

---

tauagavale ma lona itu taumatau pe a oo ina faatu lona malo. A ua tautino e Iesu e le faapea lona malo, o le tagata fia sili ia fai ma tagata auauna, o le fia muamua ia fai ma tagata tautua.

### **1. O Ierusalem a o le aai o le osiga taulaga.**

O le mea lea na le mamate i ai le nuu o Isaraelu, aua ua ese le tulaga ua latou faamoeme ai mo Isaraelu. Ua le avea ma aai o le osigataulaga faapei ona faia e Tavaita lo latou tama, e fai ma aai e atia'e ai le tausisia o le tulafono, a ua fai ma aai e solia le tulafono. Ua le o le aai e fai ai le tapuaiga mamalu i le Atua, ua i ai foi ma isi atua, ua ifo i ai isi tagata. O le aai e gaosi ai le nonofo lelei ma le aloia o tagata, a ua fai ma aai e fai ai le solitulafono, ma le amioletonu i le nonofo lelei o uso. Ua avea nei ma aai o le matape'ape'a ma le tu'inanau. O le nuu e amanaiaina le tagata e le taualoa, ma vaivai, a ua avea ma nuu e solipala e ua vaivai. Ma fai ma mea e saili i ai le manuia maua o le aumaumea, ma ta'ita'i o le nuu.

O le mea moni o le ala lea na faatoilaloina ai Ierusalem, ona ua le maua i ai le faamoemoe mo le tagata osi taulaga, a ua fai ma mea e nofonofo ai le aufaitaulaga ma le au faatalitali taulaga. Ua avea ma aai e atia'e ai le manuia o le au faitaulaga. O le ala lea na ia tautala sa'i ai ia Ierusalem, *"Ierusalem e, Ierusalem e, o le fasiotia perofeta, ma fetogi i maa e na aauina atu ia te oe; po ua faafia ona ou mana'o e faapotopoto i lau fanau e pei o le moa ona ofaofata'i i lana toloa'i i lalo o ona apaau, a e le mafafai outou!"* Luka 13:34.

O Samoa o le nuu ua osi feagaiga ma le Atua, ua i ai foi lana anava tau, o tagata ma le laueleele e ositaulaga i le Atua. Tau lava ina toe faamanatu atu pe o moni pea lea tala mo le nuu. Le lotu sei vaai lelei lou tiute o le faamanatu ma logo le siufofoga faaperofeta o le Atua, ina nei o tatou nofoa'i, a ua i faitoto'a le malaia, e pei ona tupu ia Ierusalem. Se'i apoapoa'i le atunuu, ua i ai

mea faatupumala, ua amata ona taliaina, ina ia toe sasaa le fafao, i le faautaga ma le moe. A o lou tofi ne'i o tatou pei o so'o, le fia saofa'i foi e pei o alii sili, a e galo le feau o le finagalo alofa o le Atua.

### **2. O le osiga taulaga a Iesu na faai'u i Ierusalem.**

Ua leva ona faailoa e Iesu i ona soo, le tuuina atu o ia i lima o le au ositaulaga ma ta'ita'i o le lotu Iutaia. Aua o le mea lea na afio mai ai, a o alu malie le malaga faatutu i Ierusalem, a ua fia a'oa'o pea o ia, i le uiga o lona afio mai, o le malo o le Atua ma uiga o le malo o le Atua, ma e fai i le malo o le Atua. Ina ia a'oa'oina ai ona soo. O le taunuuga lava lea o lana feau, na faai'u i le taulaga na osia, na tautau ai i le laau, i tuapa o Ierusalem, ona o le lalolagi agasala.

O le uiga lea o lana feau i ona soo, afai e fia sili ia fai ma tagata auauna, afai e fia muamua ia fai ma tagata tautua. O le ala lea ua faasino mai e Keriso, ina ia mafai ona iloa e ona soo. E le o le fai ma alii sili, pe fai ma pule, pe fai ma tagata ta'ita'i, a o le tagata e fia mulimuli ia Iesu ia fai ma tagata auauna. Ia fai ma tagata tautua.

E faitio le lalolagi i faifeau, ona ua manatu ua avea le galuega ma ala o le sailiga manuia mo le tagata. A ua galo lea feau o le finagalo alofa o le Atua. Sei toe tilotilo ane pe le o moni lea gagana ia i tatou.

### **3. Ia ola le Ekalesia i le olaga faa ositaulaga.**

E le'i finagalo lava le Alii ina ia tatou o mai e fai ma tagata maumea, ma fai ma tagata milionea i le lalolagi. Pe fai foi ma tagata faaputupu mea i lana lalolagi. A e ia fai ma tagata tautua ma auauna. O le feau foi lea mo le Ekalesia ia fai ma tino fa'aauau o le osiga taulaga a le Alii i le lalolagi.

Aua tatou te faalogo fua i tala a isi tagata, pe faaititia lou soifua ositaulaga, ona o le finagalo

---

o le Atua. O loo tele pea ana feau e fia faia, mo ona tagata vaivai, le tagolima, matitiva, sei toe vaai i lau galuega faapapai atu mo i latou na e manaomia lau fesoasoani. O nisi o galuega moomia mo le finagalo o le Keriso. Tuu ia nisi fale tetele ua lava na fale, a e sei tilotilo ane i nisi o moomia le fesoasoani, e pei o tagata matitiva. O au taulaga o loo faia, o le finagalo lea o Keriso mo lana Ekalesia, faapapa'i atu lou alofa i e ua mana'omia. O le Ekalesia a le Alii, e mo ona tagata mafatia, ua toatele le au mafatia i Samoa, e le ona o le faitaulaga soo e afua ai, e le ona o le lotu foi e afua ai, a ona o le olaga faimamago, matapeapea, le amioletonu, o le faiga o le tamaoaiga o le lalolagi. Ona o le ala o saili ai e le au maumea ina ia faatele a latou mea, e afua ai ona i ai le mativa. Le Ekalesia, o lau lea galuega, ma le ala o lou ositaulaga, ina ia alofaina e ua mafatia. Ua leva lou ositaulaga i a'oga, fai pea, ua e alofa i e mama'i ma mafatia, toe vaai nisi ala e fai ai lau osigataulaga, mo le Alii ma lona finagalo. Ia manuia tele lou soifua auauna mo le Atua ma ana feau. I le suafa o Iesu. Amene.

**Saunia Susuga Enefatu Lesa FT**  
**EFKS Tanoalei'a**  
**Matagaluega VAIMAUGA**  
**(E sui ai le Lauga na atofa)**

## **TUSI FAITAUASO, 24-30/9:** **LULU MA SELESELE**

E lua itu o le tupe siliva, i le matalalaga faasino i le lūlū ma selesele. I le tasi itu o i ai le ata po o le faatusa o le tagata, na faia ia foliga i le Atua galue – ia avea ma tagata fiafia e lūlū, ia to'a'aga e galulue, e ofo atu e auauna, tautua, ati a'e, saili malo. Ia 'aua le avea ma tagata ola paiē, ola faasamasamanoa, faatalitali mo mea maua fua, faamoemoe i auala filemu ma le faigofie e ola ai. Leai. A ia avea ma tagata ola finau, tauivi, faamalolosi. E le gata i lea, a e ia lūlū foi i le mea e gata ai le mafai, o le a se malosi, se agavaa ua foai mai e le Atua, ia tuu uma i ai; ia tautua i le matavela aupito maualuga, ausia gata; ia auauna

i le faamaoni, le alofa, le usitai e atagia ai le soifua galue o le Atua.

O ituaiga tagata ia, na finagalo ai le Atua mo Isaraelu, lona nuu filifilia i le Feagaiga Tuai, i le faato'aina o lo latou tofi, fai mai e tafe ai le susu ma le meli. A o laufanua o Palesitina e gaoā, maugā ma laulau tofa. O le feau ma le lu'i mo le nuu o le Atua, se'ilogā e matua'i tuu atoa i ai le loto, ma le malosi o le ola faalagolago i le Atua; seilogā e matuā tatafe loimata maligi, le afu sisina, ma tafe totoi le ola auauna, ona faato'a tafe mai lea o manuia, ma tofo i le suamalie faa-meli, o seleselega. Fai mai a latou fatu pese, "*O e lulu saito ma loimata...o le ua alu atu ma tagi fano, o loo ave le saito e lulu, e foi mai lava ia ma le alaga fiafia.*" (Sala.126.)

Ia lūlū foi na o fatu e iloa e fua mai i fua lelei. Le saito o amio faapa'aina, o le tautua faamaoni, o filifiliga amiotonu. 'Aua le lūlūina le titania, le vao tuitui ma le talatala o amio pi'opi'o, le tautua pa'ō, ma faiga faatiapolo; auā e fiu e lafi i ona faafoliga tutusa ma le saito, a e maua lava i ona aso e tatau ai, e se'i ese, ma susunuina i le afi. "*Aua nei tatou faapalapala i le amio lelei; auā o ona po e tatau ai, tatou te selesele mai ai, pe afai tatou te lē faavaivai.*"

E lē gata la i le tulaga tau le lūlū, a o loo mamauina ai foi i le isi itu o le tupe siliva, le seleselega, le faatusa o le Atua alofa faamaoni i lana tagata faigaluega. E i ai le seleselega, mo soo se luluuga. O le alofa na te sasa'a faaua ifo, faamanuiaga sautualasi, i luga o le auauna e tautua ma galue faamaoni; o ē na i ai taleni e lima ma le lua, e toe saga faaopoopo ma faateleina. E pule i mea e tele, e ulufale i le fiafia o lou Alii. A o le Atua amiotonu foi, na te faia le faamasinoga sa'o ma talafeagai, ina ia tauia ai le tagata e faata'eta'ealuga lana lūlū, e faapa'ole lana tautua, e matavale ma lapelapea lana auaunaga. E fao ese le mea e tasi sa ia te ia, e tulia i fafo i le pogisa, i le tagi auē ma le lilivau o nifo.

Fai mai le aposetolo, "*Aua nei faaseseina outou, e lē ulagia le Atua, auā o le mea e luluina e le tagata, o le mea lava lea e seleseleina mai ai e ia.*" "*Aua nei tatou faapalapala i le amio lelei; auā o ona po e tatau ai, tatou te selesele mai ai, pe afai tatou te lē faavaivai.*"

E si'i nei le viiga i le Atua, ina o manatua ma le loto faafetai, malu o le malo o e ua fai i lagi le

folauga. E manatua le soifua tautua malo, le soifua saili malo, o tamalii ma failauga, o faletua ma tausī, o alii ma tamaitai, sa tautua i le Atua, tautua mo Samoa, e ala i le Matagaluega, i o latou tofiga. Sa ofo atu lo latou soifua atoatoa, i le puipuiga o le saogalemu o tagatanuu; sa fita i tuga, i le tausiga o le tulafono, ia faataunuuina le amiotonu, o le soifua pulea lelei o tatou tagata. Aemaise lava i latou na tagata valeina, i le faatinoga o latou tiute faa-leoleo. Ua uma la latou luluuga, ua latou selesese foi faamanuiaga e tatau ai. Ua maliliu toa, e manatua Pule, fai ma viiga o le Atua.

O le mataupu 11 o le Tusi i le Au Eperu, e ta'u o le Maota o Toa o le Faatuatua, i le Tusi Paia. (Hall of Fame of Faith in the Bible). O loo i ai le lisi umi o toa – toa o le malo Isaraeli i le Feagaiga Tuai, faapea foi ma toa o le Tala Lelei, toa o le Ekalesia i le Feagaiga Fou. I latou na mua i malae, i le asaina o le vao filifili, o le malo o le Atua, ona o lo latou faatuatua. A e ese ai le Tusi o le Ola i le Malo o le Lagi, o tusia ai suafa uma, o e sa tautua faamaoni ia Iesu Keriso. Ai foi se manaia, a e fai se tatou Maota o Toa, e faamauiina ai suafa ma ata, o toa o le Matagaluega Leoleo ma Falepuipui, o auga o aute o lenei aso.

A o se avanoa lelei foi lenei e fesili ifo ai, i tatou o soifua pea ma fa'aauau le auunaga, to serve and to protect. O a mai la tatou luluuga? E lē aofia Matagi, a e lē o toe po malaē, i mea o tutupu i nei aso, i tala ma tusitusiga faasaga mai i le Matagaluega nei, ua taulamua Malu o le Malo le soli o tulafono; e atagia ai peisea'i ua tau pa'ū teisi, la tatou auunaga, nai lo le tulaga mana'omia; pe ua fai ifo foi le faatuatua e le atunuu, o la tatou ta'ita'iga ma le tautua, mo le saogalemu, malu puipua o le tulafono. Ui i lea, e leai se afaina, auā e lē faasesēina e manatu o tagata, le silafaga ati a le Atua, i le moni pe leai, o la foi e faia le faamasinoga tonu. O la Iesu, "*Amuia outou pe a latou upu leaga, ma latou tuua'iina pepelo outou...*" A o le leo faaperofeta ma le taologologo faa-Masefau, o se fafagu lelei lea, ina ia toe timata ai la tatou upega, toe liuliu ma fetu'utu'una'i muniao, i le faatinoga o tatou tiute, auā e tele le alofa o le Atua, na te faamagalalo ai, pe afai e salamō faamaoni. O loo momoli mai mo'omo'oga alofa ma faamanuiaga a le Ekalesia Faapotopotoga Kerisiano Samoa, mo le Aso Faamanatu o Malu o le Malo 2023. Ia i le Atua le viiga. Amene. **(Faatonu Sulu)**

## **OSIGA FEAGAIGA** **EFKS FOGAPOA**

*“O le mana’o ua taunuu, o le laau o le ola lea”*

O le Aso Farai 29 Setema 2023, na faataunuu ai le sauniga o le osiga feagaiga a le EFKS Fogapoa, Pulega Safotulafai, Matagaluega Faasaleleaga, ma lo latou faifeau, susuga Olive Samuelu FS ma le faletua ia Maria Kofe Samuelu. O le susuga Tesimeta Afamasaga FT le Toeaina o le Pulega na ta'ita'i le sauniga ma osi le feagaiga i luma o le Atua ma le faapotopotoga sa auai. O Silipa Silipa FS (EFKS Fusi) na faitauina le Tusi Paia ma fofogaina Talosaga, o Ioane Tauiliili FS (EFKS Salelavalu) na faia le lauga mo le faifeau ma le faletua, a o Valaauina Taumua FS (EFKS Salelologa) na lauga mo le aulotu.

Sa faatumulia le sauniga i le mamalu o le Ekalesia sa auai e molimau ma faamanuia le amataina o le galuega a le faifeau ma le faletua. O le afioga i le Taitaifono Fono Tele, susuga Esera Auatama Esera FS & Litara, susuga i Toeaina ma Faletua o le Matagaluega Faasaleleaga, le Toeaina Faatonu ia Leaso Tupa'i FT, Faasavala Leilua FT (Pulega Salega), Fiafia Toleafoa FT (Pulega Amoa), Palemia Tauiliili Reupena FT (Pulega Gaga'emauga Itu o Tane, a o le lupe na fa'ia mai le Pulega Safotulafai), faapea faafeagaiga ma faletua. Sa faapea foi ona faatumulia i le paia o matua, aiga ma uo, o paaga ma le Vasega Malua 2008, tainane o faafeagaiga a le afioaga. Sa auai foi le Sui o le Fono Sui Tofia, Hon. Tuiletufuga Le Mamea Ropati Mualia ma lana Masiofo.

O le susuga Olive na a'otauina i Malua i le 2005-2008, na i'u ma lona faailoga o le B.Theology, ma fa'aauau i le Kolisi Faafaifeau a le Pasefika i Fiti 2009-2010 mo le faailoga Master of Theology & Ethics, *Distinction*. 2011 - 2023 na galue ai o ia o le Faia'oga i le Vaega o Mataupu Silisili i le Kolisi Faafaifeau Malua, ma le A'oga Tusi Paia a Malua. O le susuga i le faafeagaiga o se lupe faalele a aiga i Fagamalo, Neiafu ma Sagone. O le faletua ia Maria na te umia le faailoga o le Diploma of Theology mai le A'oga Tusi Paia Malua, ma sa galue o se Tausi Tusi Sinia (Snr Librarian) i le Faletusi a Malua. O se taulaga soifua a aiga ma afioaga o Apia, Salailua, faapea Uea & Futuna. Ua sui atu i la'ua ia Ioane Viliamu Samoa FT & Vaita'i, na penisione tausaga nei.

---

# NA O AFIOGA E TULEI MAI ONA FOFOGA

---

*“<sup>6</sup>Ua logoa mai i nuu...ua e manatu oe ma sa Iutā e fou;”* Neemia 6.

Ina ia taofia Neemia mai le toe fausia o pa o Ierusalema, na faatupu ai e ona fili o tala fatu ma tala sesē ma latou faasalalau solo ina ia iloa e le toatele. Na oo atu se kopi o nei tusitusiga ia Neemia: *“Ua logoa mai i nuu, ua fai mai ai foi Gesemu, ua e manatu oe ma sa Iutā e fou; o le mea lea ua e ati ai le pa, ia fai oe ma tupu ia te i latou e tusa ma nei upu.”* E lē mafai ona e pulea mafaufauga o tagata, pe taofia foi i latou mai le faasalalauina o latou manatu, a e mafai ona e pulea ma faatonotonuina lau tali atu i ai. Na faapena ona tali atu i ai Neemia, *“<sup>3</sup>Ona ou auina atu lea o le sāvali ia te i latou, ua faapea atu, “O loo faia e a’u le galuega tele, ou te le mafai ai ona alu ifo. Se a le mea e tu’ua ai le galuega i lo’u tuulafoai ma alu ifo ia te i latou? <sup>4</sup>A ua foi faafa mai la latou feau faapena ia te au; ua faapena foi ona ou tali atu ia te i latou.”* E tolu ni a’oa’oga taua mai lenei tala mo i tatou:

**(1). Ia ‘aua ne’i faasili atu lou amana’ia o manatu o ou fili, nai lo se finagalo o au uo.** Mo Neemia, o tagata sa sili ona mamafa i ai lana vaai, o i latou o ana uo ma e sa lagolago, fesoasoani atu ia te ia, nai lo i latou sa tete’e atu ia te ia ma lana galuega sa taumafai. O le mea lea, na te le’i taumafai e suia mafaufauga o tagata, a e na suia lana auala, sui lana metotia ma aga’i pea i luma.

**(2). Ia e manino lelei e o mai faatasi le avanoa ma le tete’e.** O loo molimau le aposetolo o Paulo, *“<sup>9</sup>Auā ua fa’aavanoa mo a’u le faitoto’a lautele ma le matuā aogā, e toatele foi o e faatu’i ese.”* 1 Kori.16. O faitioga o se faailoga o le fa’aaloalo; pe ana lē manuia au taumafaiga, latou te lē amanaia lava oe, e le ‘au taufaaleaga!

**(3). Ia manatua o taua tetele latou te aumaia manumalo tetele.** E lē tuuina atu e Satani se tusi faamalo ia te oe ina ua e filifili e fai le finagalo o le Atua; na te faasaga tau ia te oe i laasaga uma o le ala ina ia faatoilalo oe. *“<sup>4</sup>O outou le fanau e, mai le Atua lava outou, ua outou manumalo foi ia te i latou, auā e sili o ia ua ia te outou, i le ua i le lalolagi.”* 1 Ioane 4. O le aso nei o loo i ai le Atua i ou autafa, o le mea lea e mautinoa ai lou manumalo.

*“<sup>16</sup>O laau uma o le faatoaga e te ‘ai ai.”*

Na maua e Atamu se olaga e sili ona manuia - o se avā faaipoipo lelei ma se aiga manaia, o se galuega na valaauina ai, ma lona si’osi’omaga tamaoaiga ma filemu - o se ituaiga soifuaga e moemiti i ai soo se tagata. Na faapefea ona ia maua lea manuia? O le faamanuiaga ma le tali lena o lona faiā ma le sootaga vavalalata ma le Atua! Na tuu i ai e le Atua ni faatonuga se lua e ola faatatau i ai: *“<sup>16</sup>O laau uma o le faatoaga e te ‘ai ai. <sup>17</sup>A o le laau e iloa ai le lelei ma le leaga, ‘aua e te ‘ai ai, auā o le aso e te ‘ai ai e te oti ai.”*

O tulafono e lua:

1). I le mafuta ai ma le Atua, o mea e te maua mai e sili atu nai lo mea e te tuuina atu. *“O laau uma o le faatoaga e te saoloto ai.”* Peitai o le mea e masani ona tatou faia, o le mea foi lea e masani ona fai e lotu ma tapuaiga, o le faitau i le afioga lenei a le Atua (ma isi foi faitauga faapea), ona mata’itū lea o mea tatou te lē mafai ona fai. O le upu moni, pe afai e ova atu le lisi o mea tatou te lē gafatia, i la tatou lisi o mea ua tatou saoloto e fai, o lona uiga ua matua’i mamao ese a tatou fuafuaga nai lo le faamoemoe o Afioga Paia a le Atua. O le soifuaga o le Kerisiano e tatau ona fua i mea ua e saoloto e fai, a e lē o mea ua teena ia te oe.

2). Pe afai e olaina lou olaga e tusa ma le finagalo paia o le Atua, a e lē o ou lava lagona, ua faamanuiaina oe. *“<sup>29</sup>E! ana ia i latou lena loto e matata’u mai ai ia te au, ma tausiusi i a’u poloaiga uma i aso uma lava, ina ia manuia ai i latou, atoa ma a latou fanau e faavavau.”* Teute.5. Na o le pau lava le mea e te’ena mai e le Atua mo i tatou, o le aiā tatau tatou te filifili ai mo i tatou le mea e ‘lelei pe leaga’, auā na te silafia tatou te lē agavaa i ai. E ao ona tatou ola e tusa ma le fa’aaliga paia mai le Atua, a e lē o tu’inauga faaletagata e lilifa i ai o tatou lagona. O le Atua, i lona alofa ma lona atamai, ua na faata’atia tonu lenei tapulaa e puipui ai ma faamanuiaina ai i tatou.

---

## **O VAI MA AFI**

*“1 ‘Aua le fefe, auā ua ou faatauina oe, ua ou valaauina oe i lou lava igoa; e faia oe mo’u. 2 A e sopoia atu le vai, ou te ia te oe; a e sopoia atu vaitafe, e le lofia ai oe; a e savali i totonu o le afi, e le mu ai oe; e le susunuina foi oe i le mumu o le afi.” Isaia 43.*

O vai ma afi o mea aoga i le soifuaga o le tagata i aso taitasi; o taumafa, o gasesega ma le faamamāina, e faamafanafana ma faamalamalama ai. Peitai, e i ai taimi e avea ai le vai ma le afi o ni mala faalenatura, e pei o lologa ma tafega, o mu ma malaia e faaumatia ai laufanua, o aiga ma atina’e. I le Tusi Paia e fa’aaoga le vai ma le afi o ni faatusa o faamanuiaga mai le Atua, e pei ona avea ai le timu ma le to’ulu ifo o uaga, o se faatusa i le liligiina ifo o le Agaga Paia, ma le afi faaniutu e iloa ai le Atua ta’ita’i, le Atua leoleo. A o nisi foi taimi e avea ai le vai e auala mai ai le toasa ma le faamasinoga a le Atua e pei o le Lolo i taimi o Noa, ma le mu o Sotoma ma Komoro.

O le i ai o Isaraelu i le Tafeaga i nuu ese, ua faatusa i le lofia i tafega ma lologa, po o le i ai i totonu o se ogaumu aasa ma vevela, i lagona tiga ma faanoanoa o le toilalo popo ma ‘ave faapagota. A faamatala ma faauiga e tusitala o le tala faasolopito, tusitala faa-militeri o le lalolagi lenei mea, latou te manatu o le i’uga lea o le malosi faa-fitafita o le tasi malo, ma lo latou atamai faamiliteri e pei o Asuria ma Papelonia, e faatoilalo ai isi malo vaivai e pei o Iuta ma Isaraelu, ma ave faapagota ona tagata e tautuaina i latou. O nisi tusitala e faamatala mea faapenei e tutupu, o se faailoga o le malosi o le tasi atua ua manumalo i le isi atua o malolo lona nuu. Peitai i le vaai a perofeta o Isaraelu e pei o Isaia, o le Tafeaga o le i’uga lea o agasala mata’utia a Isaraelu, i lo latou va nonofo ai ma le Alii lo latou Atua. O le tau i lea o lo latou soli o le feagaiga, ua latou tuua le Atua moni e toatasi na valaauina i latou, a e mulimuli atu i atua ma tupua faapaupau o nuu ese. Lenei la, ua faasaga mai le Atua i lona to’asa e faamasino ma faasala i latou; ua na fa’aaoga ai le malosi faafitafita o nuu ese, e fai ma sasa e a’oa’i ai lona nuu loto ma’a’a. I le vaai a le perofeta, e le o se faailoga o se malosi o Papelonia, a o le fuafuaga a le Atua na te pulea malo uma, e fa’aaoga lona malosi i lea taimi, e fai mana auupega e faataunuu ai lona finagalo.

E ui lava la ina feagai Isaraelu ma tiga ma faanoanoaga ona o lona toasa, a o le to’asa ua na o se emo o le mata, faatusatusa i le faavavau o lona alofa mo lona nuu. “7 Ua se emo lava o le mata na ou lafoa’iina ai oe, a o le alofa tele lava ou te faapotopotoina mai ai oe.” Isa 54. Na te faia le a’oa’iga mo lona nuu ia pototo ma atamai, ia salamō ma toe fuata’iina, a e na te lē tuulafoa’iina i latou i taimi o puapuaga. O le uiga lea o lana faalototele, faamafanafana, e ala atu i lana auauna perofeta, ‘Aua le fefe, auā ua ou faatauina oe, ua ou valaauina oe i lou lava igoa; e faia oe mo’u. 2 A e sopoia atu le vai, ou te ia te oe; a e sopoia atu vaitafe, e lē lofia ai oe; a e savali i totonu o le afi, e lē mu ai oe; e lē susunuina foi oe i le mumū o le afi.”

Ia manatua, ua uma ona tofo i ai Isaraelu o auga tupulaga ua lagomau mai ti’asa, i lenei alofa fai vavega o le Atua, o le ui i totonu o le vai a e le lofia - e ala i le vaeluaina o le Sami Ulaula ma le Vaitafe o le Ioritana; na ui foi i totonu o le afi a e le mu, ina o ta’ita’iina e le Afi faaniutu. O se feau faamanatu mo le nuu, e ui ina eseese auga tupulaga, e ui ina eseese ituaiga tiga ma puapuaga, a e tutusa lava le Atua ma lona alofa e le liu e le suia, a e moni ma e faavavau lava. E pei ona sa faaola le Atua a o pologa i Aikupito, e faapea foi ona la toe faaola a o pologa nei i Papelonia.

A o le folafolaga foi e lē mo na o Isaraelu, a ua faasino tonu mo i tatou uma e atua i le Alii le Atua, o e ua faatauina e Ia, ua valaauina e Ia i o tatou lava igoa, ua fai mona. Ua uma ona faatauina i tatou e le Atua i le tau, o le toto o Lona Alo o Iesu Keriso, ua valaauina ai i tatou e faia mo Ia e ala i le faatuatua. Tatou te fetai’i pea ma tafeaga eseese o le olaga, o vai tatafe ma lolovai, o afi ma malaia, o tiga ma puapuaga ona o mea tutupu e le oo i ai so tatou pototo, e le au i ai la tatou pule ma le malosi. A e maise foi le oti, e tete’a ai ma e pele i le mafutaga faaletino nei. O lenei lava le Upu faalototele, faamafanafana mo i tatou, e pei foi ona fetalai Iesu Keriso lo tatou Alii Toetu, ‘Aua e te fefe, o a’u le muamua ma le mulimuli... ‘aua le atuatuvaile o outou loto...ou te le tuua outou...e ui ina oti, a e ola lava ia.”

O ana afioga ua avea ma vai mālū e malie ai le agaga ua galala ma ausage, a o le sulu e faamafanafana ma faamalamalama ai le loto ua ogotia i le vevela ma ufitia i le pogisa.



---

# ***O LE PEROFETA MULIMULI***

***(O le tala faasolo faaSamoaia mai le tusi, 'The Last Oracle' tusia e James Rollins)***

“A e a lo’u tamā?”

“E maunoinoa lava. O lou tamā sa talitonu e i ai le fesootaiga vavalalata i le va o le autisema ma ana lava su’esu’ega aga’i i le malamalamaga tu’usa’o ma le vaaiga faalemafaufau i le lumanai.”

“Ma sa ia mauaina le fesootaiga?” na fai atu ai Karai.

Sa mapuea le polofesa. “A o tatou lē iloa tino le mafuaaga o le autisema, o le toatele o saienisi ua latou autasi, e sefulu kenera eseese e fai o latou sao i le faailoaina mai o nei tulaga. Sa faatamo’e e Atipale nei kenera e sefulu ma maua ai o le tolu o nei kenera sa taatele ia i latou e i ai taleni maoa’e. O le tulaga maualuga faaosofia lea na ia sailia. Faatasi ai ma nei kenera e tolu, na ia amata loa ona saili ma faailoga nofoaga tonu, sa alia’e mai ai nei uiga. Na ia tula’i mai ai ma se faafanua.” Na pasi atu e le polofesa se pepa sa i luga o lona vae ia Elisapeta. O se faafanua o Initia. I luga o le faafanua, na faailoga solo ai pe tusa ma le selau o faalapotopoto nini’i.

Na su’esu’e e Elisapeta ona tuu atu lea ia Karai. Na faamatala e Eiteni, “O faalapotopoto nini’i taitasi e ta’u maia se tagata e toatasi o loo ia tauaveina le faailoga o le kenera. A e a silasila toto’a i ai, ona iloa lea o le tele o faalapotopoto o loo fa’aalia i autafa o aai tetele, e pei o Teli ma Mumupai. Ma e malamalama gofie lava, auā o le toatele o tagata e nonofo ai i nei aai.”

“A e faapefea luga i iinei?” na fesili ai Karai a o tusi lona lima i le itu i matu.

Na iloa lelei e Elisapeta le mea sa fesili ai Karai. O se faaputuga o faalapotopoto nini’i – e sili atu le tele nai lo se isi nofoaga – sa faaputupu i le itu i matu, o le nofoaga e leai se aai tele o fa’aalia mai ai.

“O lena tonu lava. Sa faapena foi ona fesili taumate Atipale.” Na toe avatu e Eiteni le faafanua ma tā tā le vaega o loo faaputupu ai i le itu matu. “Na ia taula’i le tolu tausaga mulimuli o lona soifua i le nofoaga lena. Na ia mana’o e saili pe aiseā na faaputupu ai iina.”

“O le a le mea o loo iina?” na fesili ai Elisapeta. “O le Punitapu.” O le tali na sau mai tua atu o Elisapeta. Mai ia Luka Heni. “Le nuu moni muamua o le Romani.”

“O le mea moni. O le mafuaaga lena na faafesootai ai e Atipale le ituaiga o Kipisi i Europa ma le Lunaite Setete. Na ia maua e pei se mea fetau lava le tupu a’e o le tala faasolopito tamaoiga o perofetaga ma le faailoaina o manuia, na oso a’e mai le nofoaga e tasi, ma sosolo atu ai i Europa ma tala atu. Na ia saili ia iloa pe sa filo faatasi ai ma lana maka kenera i le au Kipisi.”

“Sa i ai la?” na tuu atu e Elisapeta le fesili ia Eiteni faatasi ma Luka.

Na tali Eiteni, “Toe, peitai sa le’i maua i le faaputupu na ia masalomia. Na ave ma mea sa le fiafia ai lou tamā.”

Na fai e Luka se leo lē faamaoni.

Na liliu atu Elisapeta ia te ia. “E a?”

“Sa i ai se mafuaaga,” na fai atu ai Luka.

Na faliu mai Karai. “O le a le uiga o lau tala?”

“O le mafuaaga lena na tatou faafaigaluegaina ai Fomai Poleki.”

Na manatua e Elisapeta o le ta’ita’i o le auaiga Kipisi sa na ia le’i faamatala atoatoa i le mataupu. Na ia amata ona faamatala i luga o le vaalele, peitai na faalavelaveina i latou.

“E pei ona sa ou fai atu muamua, na saili Dr Poleki e aoao mai ni vaega o toto mai a matou koviani aupito talenia. E le o ni tagata taufaasesē, a o tagata vaai maui. A e sa i ai se toaititi ia i matou na latou ausia lea tulaga.”

“Aisea?”

“Ona o le fatu o lo matou nuu na gaioia mai ia te i matou.”

Na fa’aauau ona faamatala lemū i se leo ‘o’olo ma ita e Luka, le talatuu i se misiterio loloto o lona nuu, o se mea e tala i tua i senituri ua mavae. O se mealilo faasino i se aiga e tasi, se aiga sa aupito sili ona faapelepeleina, sa i ai faatasi i totonu ma isi aiga e tele. Sa tapu ona talanoa ai nisi, pe ta’uta’u atu i tagata ese. Na faailoga ese lena aiga, sa faalafi ma puipua e isi aiga uma. O le punāvai moni o le tofi faa-perofeta o le au Kipisi. I nisi taimi a e lē tupu soo, o nisi o nei koviani sa o ese atu ma nonofo faatasi ma isi aiga, e faasoa ai latou taleni, sa fai avā ma nofo tane ai. A o le tele lava ina latou nofo ese ma nofo valavala mai isi. A e te’i ane, pe tusa o le lima sefulu tausaga talu ai, na maua ai le aiga lena. Na maua uma tamaloloa ma fafine, ma sa fasiotia



---

faataugā pei ni manu, ma tanumia i se tuugamau papa'u ma aisā.

Na faasolo le leo o Luka ina faapitoa lona ita. “Pau lava le mea, o totonu o lona tuugamau na tatanu faatasi ai tagata, sa le'i maua ai ni ivi o ni tamaiti.”

Na malamalama Elisapeta i lona aafiaga. “Na ave e se tagata.”

“Matou te le'i mauaina po o ai... a e le'i uma ai lo matou sailia. Sa matou faamoemoe ia Dr Poleki ma lana metotia fou e saili ai asaasa o le auala – e ala i DNA – o le a matou maua ai ni asaga ua leva ona maluluina.”

“Sa manuia ana taumafaiga?” na fesili ai Elisapeta.

Na lūlū le ulu o Luka. “Na te le'i faailoaina. Na ia lafoina mai se fesili tulaga ese se tasi i nai masina talu ai. Na ia fia iloa atili e faatatau i lo matou tulaga lē matagofia, le au lē mautofi ma leai se tulaga o Initia.”

Sa le'i iloa e Elisapeta po o le a le uiga. Na ia tepa atu ia Eiteni, a e na faamimigi le polofesa. Ui i lea, na maitauina e Elisapeta se mea i ona foliga, le faapuiti o ona mata. Na ia iloa se mea. Peitai nai lo le faamatalaina, na ia makaina se ekisi itiiti i luga o le faafanua i lana peni.

“O le a lona?” na fesili atu ai Elisapeta, a o ia vaai atu e taatia tonu i le ogatotonu o le faaputuga o togitogi i le itulagi o Punitapu.

“O le nofoaga lona e alu i ai le isi a tatou malaga, pe a tatou mananao i tali.”

“Ma o fea lona?” na tuliloa atu ai Karai.

“I le nofoaga na mou ese atu ai Atipale.”

6 Setema, 5.38 afaifi

Piripiatu, Ukureni.

Na kolosi atu Nikolao i totonu o le paka faafiafia o le aai aitu.

O taliuta o taavale lanu samasama tuai sa nofonofo i vaivai lanu meamata, i totonu o vaovao uumi tau i sulugatiti. O le tualuga o le ti'eti'ega ua leva ona masofa malepelepe, na taatia mai ai se faavaa o faaputuga 'ele lanu mūmū o loo faamalumu ifo ai. O luma atu, na ea a'e ai i luga le uili Feri telē faa-sau'ai – le Tipa Tele – i le vanimonimo i le tauafiafi fesaga'i ma le goto maualalo ifo o le la. O ona nofoa faa-faamalu samasama na tautau ifo mai le auivi 'elea. O se faailoga ma se maa faamanatu i le faatafuna'ina na tuua ina ua mavae Kerenopila.

Na fa'aauau atu pea i luma Nikolao.

O le paka na fausia fuafua mo le faailogaina o le Aso Me (Mei Tei) i le 1986. Peitai, o le vaiaso a o lumanai le sauniga, na fasiotia uma ai le aai o Piripiatu sa nonofo ai tagata faigaluega e fa sefulu valu afe ma o latou aiga, na susunuina i lalo o le malosi o aafiaga o kasa vevela. O lona aai, na fausia i le vaitau 1970s, sa avea o se faataitaiga ma le faatusa o le atamai faa-tufuga fau aai o Rusia ma le soifuaga i taulaga: o le maota o faafiafiaga le Enetekita, le fale talimalo faavaomalo o le Polisia, le maota gasegase maoa'e, ma falea'oga matagofie.

O le maota o faafiafiaga ua taatia nei o se faatafuna. O le fale talimalo ua tutupu a'e ai laau i totonu. O falea'oga ua malepelepe, o faaputuga tusi, mea taalo ma poloka laau sa fai ai a'oga a tamaiti o fola solo. I se potu na vaaia ai e Nikolao ni ufimata, sa puipuia ai foliga mai kasa, o taatia i se faaputuga ma iloa atu ai pei ni foliga o tagata maliliu ua saeia ese pa'u ma aano. O le aai sa matagofie ma lalelei, ua avea ua na ose nofoaga o faamalama ta'ei, o puipui o fale masofasofa, moega malepelepe ma lapisi eseese. O vao ma laau ua tutupu ma ola a'e i soo se avanoa, na latou sosofa i lalo mea na fausia e le tagata. O lenei ua na o se nofoaga taufaafefe, e o mai i ai tagata tafafao ta'i faselau tālā a le tagata, e molimau i le nofoaga taufaafefe.

A o le pogai o ia mea uma...

Na ufiufi e Nikolao ona mata ma pupula atu. Na ia mafai ona iloa atu i le tafailagi se patupatu tau puaoa, pe tusa e lua maila le mamao ese.

O le fale o teu ai afi malolosi o le Kerenopila.

O le pa salalau o le afi numera fa na ia lafoia se asu na afifi uma ai le lalolagi. A o iinei, sa tuuina i ai le faatonuga malosi ina ia faatuai le aveeseina o tagata mo le tolusefulu itula. Na liua uma le vaomatua i autafa o le aai i le lanu mūmū o le kasa leitiō vevela. O tagata o le aai na salu mamā polotito ma faapaologa o latou fale, a o sasao a'e le mūmū o afi pulutoni i le lua maila mamao ese.

Na lūlū le ulu o Nikolao, auā sa ia mautinoa na mulimuli atu le au faasalalau pu'e ata televise, e pu'e mai tala mo le afaifi. Na savalivali atu Nikolao i totonu o le paka o faafiafiaga malie. Na lapataia o ia ina ia tausisi i luga o le asuemu na tanu ai le auala e ui atu i totonu o le aai faatafuna'iina.

---

E maualuga le malosi o le kasa leitio vevela pe afai e savalia le itu o ola ai vaovao i le aai lafoa'i. O vaega aupito matautia na faailoga i faailoilo tafatolu lanu samasama. O le ala asuemu fou na fausia mo le toatele o le a lolofi mai, o malo fa'aaloologia, ofisa o malo ma tusitala, o le a oo mai i le Kerenopila e molimauina le faapipiiga o le Sarakofagusi fou i luga o le faavae ua pala ma nuti.

E oo ane i le afiafi, o le a toe iloa foliga matagofie o le Fale Talimalo o le Polisia, o lona tulaga maoa'e sa i ai muamua. Na toe faafou faalelei ma teuteuina atoatoa le potu o faafiafiaga, ina ia talimalo ai mo se pati a le au fusiua uliuli. E oo i le laau sa ola ma tupu a'e i le taualuga ua faalalo ma aveese. Ua na o le matagofie ma mea e sili ona saunia lelei mo malo fa'aaloologia mai itu eseese o le lalolagi. O sui ma faauluuluga o malo, o le au fai ata tifaga mai Holivutu. O le a susulu Piripaitu mo leni po e tasi, o se faafiafiaga maoa'e i le ogatotonu o se faatafuna o kasa oona vevela faaleitio.

O le a auai uma le Peresetene ma le Palemia o Rusia, faatasi ai ma sui tofia o le Maota maualuga ma le Maota maualalo o le Fono Aoa. E toatele ua taunuu mai, ma ua amata ona feiloa'i atu i sui o isi malo, ua taumafai e fa'aaoga leni avanoa e faalauiloa atu ai ma faamasani i isi mo faamanuiga faapolotiki.

Peitai e leai se isi sa sili ona naunau e mataitū se suiga moni nai lo Senatoa Nikolao Solokovi. O le tuana'i ai o le taumafaiga e tagatavaleina o ia i le taeao analeila, ua ia tula'i mai ai i le faatumutumuga o tala fou. A o taumafai meapu'eata e pu'e atu o ia, na sitepu ese Nikolao mai le auala asuemu a e kolosi atu i le pa o loo i le tuaoi. O luga o le pa sa valiina ai le ata uliuli o ni tamaiti e to'alu sa ta'aalo i se loli meataalo. E faapea le tala o se alii ulu leaga mai Farani sa tele ni masina na i ai i Piripiata. O ona ata sa vali solo i vaega eseese o le aai, sa taufaafefe ma fai ma faalavelave, sa avea o le aitu o tamaiti leiloloa. O lana lava ataata, o Elena, na tumau pea i luga o le asuemu. Ua uma ona filifilia le ata leni e sili ona faamomoloto. O luma atu sa ia asiasi solo ai i le nofoaga ma lana tosimita ina ia mautinoa o loo saogalemu mai aafiaga o kasa oona vevela. Ua na o fa'aaliga o mea mata'utia o le a faia i le afiafi nei...

*(soso'o atu Sulu Samoa Oketopa 2023)*

---

# ***O E UA FAI LAGI FOLAUGA***

---

***SEUMANU LOGOITUMUA PEISEPUSI***  
***MINERVA TAAVAO MATAESE***

***Aso Lua 3 Iuni 1980 - Aso Tofi 30 Novema***  
***2022 (42+5+28)***

O se tina talavou, e pu'upu'u ma sa'asa'a aso na soifua ai pe a fua i lona malosi ma le soifua laulelei sa ia olaina ai leni soifuaga o loo o tatou ola ai. Ua taunuu ai upu a le atunuu, "E momoe lava ma manū a e sau mala e atia'e." O ia ma si ona to'alu ia Mataese Mataese o se tasi lea o matafale talavou i totonu o le Aulotu nei. O le matafale a nai ona matua, le Susuga i le Faifeau ia Pepa Taavao (FS) ma Ailini Tauvela Taavao, ina ua tuua Samoa nei a e malaga atu i Ausetalia e galulue ai mo le EFKS Leeton o le Matagaluega Niusaelese Sisifo. E toatolu si a la fanau. O se tina talavou e toaga i sauniga lotu ma fai mea uma o le la matafale auā le tautuaina o le Lotu.

O ia o se tasi o Faiaoga mo le Vasega Matutua o le Aoga Aso Sa mai lava i uluai taimi sa faatuina ai leni Aulotu, aso 04 Novema 2012. Sa avea ma taitai o la matou Autalavou i nisi o tausaga; ma, sa fa'aaauina pea ona avea ma sui auai o le Autalavou seia oo ina maliu. O loo ia te ia ni meaalofo taua a le Atua e ala i taleni ma ni agavaa maoae, o le a'oina lea o ni pese-fou, e fatu ma faapuina lava e ia. O le a'oina foi o faa-Evagelia ma tala faa-koneseti ma isi siva faa-le-agaga mo le Autalavou ma le Aoga Aso Sa, o le tasi lea atamai faa-faiaoga sa ia te ia.

E le galo le tautua ma galuega lelei sa faia e leni tina talavou ma ua onomea ai upu sii mai le Tusi Paia sa fai ma sini autu o lona olaga galue e faapea, "*Ua ou tau le taua lelei, ua i'u ia te a'u le tausinioga, ua ou taofi i le faatuatua.*" – 2 Timoteo 4:7.

---

Ou te taofi, sa iloa lelei lava ma le mautinoa e lenei tina talavou, o lona olaina o lenei soifuaga, o se olaga mo ia e puupuu ma saasaa, na mafua ai ona ofoina lona ola mo le fa'aaogaina e tautua ai le galuega paia a le Atua i le mafai sa ia gafataulima. Ai lava o se tasi lea o mafuaaga na lē fia o ai ma ona matua i Ausetalia ona e fia nofo lava ia i Samoa e galue ai mo le Malo o Samoa ma le Ekalesia. O ia o se tagatanuu Amerika e umia le tusifolau Amerika a e fiafia lava o ia e nofo i Samoa nei e galue ai. Sa avea ma faiaoga i le Univesite i Papaigalagala ma le Aoga a le Mc Gibbon Tutorial Night School. E maliu nei o ia o avea ma Failautusi Muamua (1) a le Afioaga i le Tamaitai Minisita o Faamasinoga. O lona sauniga faa-le-aiga sa faia lea i le malumalu EFKS Nuu Fou, i le itula e 3:00 pm. Aso Sa, 11 Tesema 2022. O se sauniga sa lolotu uma ai la matou Ekalesia, o ona aiga ma ana uo faapea le aufaigaluega a le Matagaluega o Faamasinoga. Taitai – Letaulau Pesaleli (FS), Faitau Tusi Paia – Taoauvao Teveli (AF), Tatalo – Foamea Tavita (AF) ma le upu faamafanafana, sa saunia lea e Iamafana Faauuga (FS), Faifeau Nofoaiga.

O ona toe sauniga sa faia lava i le Malumalu EFKS Nuu Fou i le Aso Gafua, 12 Tesema 2022. O lona sa folau sa molimoliina lea i totonu e Iamafana Faauuga (FS), Taitai – Letaulau Pesaleli (FS), Faitau Tusi Paia – Iamafana Faauuga (FS), Tatalo – Namaia Kofe (FS), Lauga – Kolia Fiu Kolia (FT). O le sauniga i lona oliolisaga tumau i le fanua o lona lava aiga i Nuufou, Falelauniu; sa taitaiina lea e Letaulau Pesaleli, o lana faifeau. Sa faamavae ma faatofa atu ia te ia i le pese masani a le au kerisiano, Pese 268 : *“Talofa, uso e, tofaina oe; Ua sau le itupo e malolo, E ala oe pe a mavae le po; Tofa! Tofa! Tofa!* Ia manuia lau malaga oe le afafine pele.

**Saunia: Letaulau Aloiai Poufā Pesaleli (FS)**  
**EFKS NUU FOU,**  
**Matagaluega FALEATA.**

---

## **NAOMI TAUTUA AURELIO**

**26/4/1959 - 30/8/2023 (64+4+5)**

O le Faletua o le Toeaina o Tautua Aurelio FT, le faafeagaiga taulagi a le EFKS Vaigaga, Pulega Faleata Sisifo o le Matagaluega Faleata. Na soifua mai le Aso Sa, 26 Aperila 1959, a e na faamanavaina e le Atua ana feau i le Aso Lulu, 30 Aokuso 2023, ona o lona gasegase o le kanesa; ua atoa ai le 64 tausaga, 4 masina ma aso e 5 o lona soifua. O ona tua'a - o le tama o Uta'ile'uo Afasene Simanu o Sapunaoa, ma le tina o Ateliane Taituuga Faamu Simanu. Na a'oa'oina i le Tulaga Lua i Logologo (Faleulu i Sapunaoa), Leifiifi Intermediate, Kolisi Leulumoega Fou. Na galue o ia i le Matagaluega Faatoaga Vaomatua ma Faigafaiva, i le vaega o Vaomatua - i Vailima 1978, ma Togitogiga 1979- 1988.

Na faaipoipo atu i le susuga Tautua Aurelio FT ia Oketopa 1982. E to'a tolu le fanau, to'a 6 fanau a fanau. O lona sauniga faaleaiga na faia i le Aso Lulu 6 Setema i le malumalu EFKS Vaigaga. Na ta'ita'iina ma faatautaia lava e susuga faafeagaiga o fanau faaleagaga a le EFKS Vaigaga. O le Aso Tofi na faia ai leoleoga na autova'a atu ai Aulotu o lana Pulega ma le Matagaluega. O ona toe sauniga sa faia i le Aso Faraile 8 Setema 2023 i le malumalu o lana Ekalesia pele i Vaigaga sa ia galue ai ma tausia mo le 29 tausaga. Na ta'ita'i le Toeaina Faatonu o le Matagaluega Faleata, susuga Misipalauni Faatau FT; o le au mau tofi e aofia ai susuga Muao Fagasua FS na faaulufaleina le sa o le tina, Letaulau Pesaleli FS na faitauina le Tusi Paia, Reupena Nofoaiga FS na saunia Talosaga, ma Iosefa Afutiti FS (Failautusi Pulega Faleata Sisifo) na lauga.

O le molimau a le EFKS Vaigaga na saunia e Ulugia Ma'ima'i AF: Na to'ai taunu'u le Susuga i le Toeaina ia Tautua Aurelio ma le faletua ia Naomi i lo matou nu'u ma le Ekalesia EFKS i Vaigaga nei i le aso 9 o Iulai i le tausaga e 1994. O lea lava aso na matou osi feagaiga ai ma avea ai i la'ua ma o matou matua fa'afeagaiga fa'amaoni. Ua alu aso, te'a fo'i tausaga, o lo'o mulimulita'ia pea faiga fa'avae a le ekalesia aoao, pei o le alu o a la'ua malologa pe a atoa le 6 tausaga o galulue pea. Ua tusa ma le 29 tausaga

---

le umi o la matou mafutaga ma le susuga i le Toeaina, ma o le umi foi lena o le matou mafutaga ma le Tina peleina ia Naomi Tautua Aurelio.

O le atoaga o le 100 tausaga o le lotu EFKS i Vaigaga nei sa fa'amanatuina lea e le Susuga i le Toeaina ia POASA TE'O ma le faletua ia FALESAU. O le ulua'i toeaina lea mai totonu o le ekalesia EFKS i Vaigaga. O ia fo'i o le ulua'i ta'ita'ifono o le Ekalesia EFKS mai totonu o lena lava ekalesia. O ia o le sogā'imiti, e le ula i ai se tagata, auā o ia o le Toa o le Talalelei.

A o le atoaga o le 150 tausaga o le lotu i Vaigaga nei na fa'ailogaina lea e le Susuga i le toeaina ia TAUTUA AURELIO FT ma le faletua ia NAOMI. O le susuga ia Tautua Aurelio ma le faletua ia Naomi o le lona lua ai lea o toeaina ua filifilia mai le ekalesia EFKS i Vaigaga nei. O le sogā'imiti fo'i, e le ula i ai se tagata auā fo'i o le isi fo'i lea Toa o le Talalelei.

Ina ua avea Faleata ma se tasi o Matagaluega a le Ekalesia Aoao, na avea ai la matou ekalesia ma nofoaga e tapuvaetasi mai i ai mea e faia a le matagaluega ma le pulega. O i, na aliali mai ai le suiga tele na faia e Naomi. O le tausī lea o le matagaluega e ala i mea taumafa. O la Naomi, "o lo'o o mai tagata i le nofoaga o i ai fo'i tagata. E lē tataua ona fo'i e aunoa ma se taumafataga". O lea aga a le faletua ua fa'asolo atoa e o' lava i la matou Ekalesia pe a aofaga potopoto i le maota o le galuega, e lē ta'ape gūgū, e o ma taumafa e gaseaina e Naomi. O le malumalu tapua'i nei e le fa'atamala i ai Naomi. Tusa lava po'o ua i ai le aiga o lona lea taimi e teuina le falesa mo tapuaiga i le Aso Sa, e lē tu'ulafoaina e Naomi. E vaai lava po o lelei ie ufi laulau o lo'o fa'aaogaina, fesili po o ua ki ea malūlū ma faaleotele leo, faamanatu mai e vaai po o lava le cash power ma le tapenaina o le Sakarameta Paia po o lava ma lelei.

O aga ia a le faletua po o lo matou tinā faaleagaga e mafai ona ou fa'apea atu: O Naomi, o le mea alofa a le Atua Soifua na tu'uina atu mo Tautua Aurelio e fai ma fesoasoani ia te ia e tusa ma lona vala'auina e tala'i lana talalelei ma folafola lona finagalo faapei ona faafale-lē-malu ai i lo matou pitonuu nei o Vaigaga i Faleata Sisifo.

O le molimau a le Matagaluega Faleata na saunia e le Failautusi Matagaluega, susuga Amosa Reupena FS: **UPU FA'AVAE**: 1 Peteru 4 : 9 - 11  
*"Ia outou talia malaga o outou ma le lē muimui. Ia taitoatasi ma auauna o le tasi i lea lava mea, e pei ona maua e ia o le mea alofa. Afai e auauna se tasi, ia tusa ma le malosi ua foa'iina mai e le Atua, ina ia viia le Atua i mea uma lava!"*

*(Be hospitable to one another without complaining. Serve one another with whatever gift each of you has received. Whoever serves, must do so with the strength that God supplies, so that God may be glorified in all things!)*

#### SOIFUA GALUE I TOTONU O LE MATAGALUEGA:

1. 1994 – Osi feagaiga ma le Ekalesia EFKS Vaigaga - Pulega Faleata i Sisifo  
- Matagaluega Apia i Sisifo

2. Fono Tele 2006 - Vaeluaina ai le Matagaluega a Apia i Sisifo:  
(Matagaluega a Apia & Matagaluega a Faleata)

3. 12 Iuni 2006 - Ulua'i Tofiga a le Matagaluega a Faleata. O i'ina lea e fia amata mai ai le Molimau a le Matagaluega.

4. Muamua - O Totonu o le Falesā!

O iinei na ulua'i molimauina ai e le Matagaluega a Faleata (aemaise lava la matou Pulega - Faleata Sasa'e) - Foliga Aulelei ma le Matagofie o le tautua, a Naomi i le Matagaluega - e ala i Teuga o le Falesā! Na atagia ai lana Tautua Mae'ae'a ma le Fai Mea Manaia!

E fai o Ie o le Falesa - E leai se pito e sili i autafa, luma ma tua, a e pe tautau foi le isi pito, a e sisi le isi pito! A e fetau lelei Lanu o Ie ma Lanu o loo fa'asino mai e le Kalena Fa'a-Kerisiano, o lea vaitau ma lea vaitau! A o le itū sa sili ona tulagaese - o Ie e Teu ai le Falesa! E le ni Ie e faatau sa'o mai i le Faleoloa ma fa'aaogā loa! O Ie na te Elei muamua lava i ona A'ao (o le tasi lea o ona faiva alofilima), ona Su'i lelei lea ma Auli; e matuā mafolafola lava, e leai ma sina maanuminumi! E oo foi la i Teu Fugalaau, e leai lava ni teu e fai i Fugalaau Palasitika, a e fa'aaoga

---

lava Fugala'au Fa'ale-Natura! E fesuisuia'i o latou fa'atulagaga (arrangements) ma le fa'aaliga mai (presentation)!

O Ulua'i Foliga na - o le Tautua a Naomi i le Matagaluega, e o'o mai lava ina ua Fa'amanavaina e le Atua ana Galuega, o faia ma fa'aauau pea lava! E lē na o Tofiga, a e o'o lava i Mafutaga ma ni Potopotoga Fa'ale-Matagaluega e fai mai iinei i Vaigaga!

5. Lona Lua - O Fafu o le Malumalu (A o Fa'agasolo le Tofiga)!

O Mea Fai Ti ma le Kofe ma le Kula Vai Aisa!

O nisi taimi - ua i ai ma Keke Saina ma Masi Saina. O le Tautua Talimalō lea a le Faletua ia Naomi - mo le Matagaluega! O lona naunauta'iga - ina ne'i umi tualumaga o le Tofiga, a e mo'omia sina Fa'amalositino! Ia Fa'amafanafanaina (Comfortable) Tagata Uma!

A e na tula'i mai ai le isi Fa'afitauli - ua tele ina nofonofo ai i fafo isi tagata, a ua lē fia o mai i totonu o le Falesā! O le isi lea Tautua a Naomi i le Matagaluega, e o'o mai lava ina ua Fa'amanavaina e le Atua ana Galuega, o faia ma fa'aauau pea lava!

6. O Fafu foi o le Malumalu - Ina ua Mae'a le Tofiga: O le Taumafataga a le Matagaluega! O Meataumafa foi e saunia ma tapenaina e Naomi - e le ni Taumafa Masani ma Taugofie! A le o se Supo Povi, o se Supo Mamoe, o Sapasui Mamoe, etc. A o le Best lava - O le Fa'ausi Talo!! E leai lava se Fai Fa'ausi Talo i Samoa, e tutusa ma Naomi! O le isi lea Tautua a Naomi i le Matagaluega, e o'o mai lava ina ua Fa'amanavaina e le Atua ana Galuega, o faia ma fa'aauau pea lava! O le a matuā misia e le Matagaluega!

7. O Fafu atu foi o le Malumalu - Au Ta'alo a le Matagaluega i Ta'aloga Aoao a Autalavou EFKS.

O le Faletua ia Naomi - o le Tusi Fu'a (Banner) & Eleiina Togiga Ta'alo a le Matagaluega a Faleata, i Ta'aloga Aoao a Autalavou! Na pau lava le mea e moomia e Naomi, o le faatau mai o Mitiafu ma Vali, ona faitalia lea o ia ma fai! O le isi lea tautua a Naomi i lana Matagaluega e oo mai lava ina ua faamanavaina e le Atua ana feau.

8. I Fafu Atili Atu o le Malumalu - Tautua a Naomi i le Tulai mai o Tinā o le Matagaluega i Tofiga Ta'ita'ifono ma Peresetene i Mafutaga ma Fa'alapotopotoga Eeseese a le Mafutaga a Tinā: O iina na molimauina ai - le Naunau o Naomi i le Fai Mea Sili ma Aupito Sili ona Lelei, e le gata mo Tinā o le Matagaluega a e mo le Matagaluega!

O itū tāua e lua (2) - i le molimau a le Matagaluega:

i). O lona Agaga Lelei e fai ai. E i ai le taimi i la'u vaai e pei ua Maa'e ai lava (Extravagant) - a o le itū tāua, o lona Agaga Lelei e fai ai!

ii). E oo lava ina avea ma Faletua o le Toeaina - e lē Suia pe Faaitiitia ai lona Agaga fia Fai mea Lelei mo le Matagaluega!

Talofa e, ia Naomi i lau Tautua i le Matagaluega a Faleata - pe fa'apefea ona Galo, a e pe Galo foi afea!

9. Pale o loo i luga o le Pusa Maluu o Naomi - o le Fa'aaloga o le Pale o le Tupu Tama'ita'i (Queen). Talofa e... o lea fa'atoa toe fa'apaleina lea o Naomi i lona Tulaga Faa-Tupu Tama'ita'i sa sau ma ia i lona Aiga! A e na tu'u ese lava e Naomi, a e fai ma Auauna fai ma Tautua a le Matagaluega a Faleata! E mautinoa lava - e sili atu le Pale la ua sauni mai e lona Alii, e fa'apaleina ai o ia! Tofa Naomi, ia manuia lau malaga!

Na mae'a le toe sauniga i le malumalu ona momoli atu lea o lona tino maluu, e lagomau i lona oliolisaga tumau, i lo la'ua fanua saoloto i Aleisa, o loo tuaoi i saute ma le EFKS Aleisa Sasa'e. O le susuga lava i le Toeaina Faatonu o le Matagaluega Faleata, Misipalauni Faatau FT na ta'ita'iina le sauniga e lafoa'i ai le lefulefu, ma faatofa atu ai i le Tina ia Naomi i le Pese Faamavae a le au kerisiano, **Talofa uso e, tofaina oe, Ua sau le itupo e malolo, E ala oe pe a mavae le po, Tofa tofa tofa.**

Ia alofa le Atua faamaise lona Agaga i le susuga i le Toeaina ma le nofo-a-alo, o aiga aemaise le Ekalesia pele i Vaigaga, le Pulega Faleata Sisifo tainane le Matagaluega Faleata ma le Ekalesia Aoao. "Ou te ola a'u, o le mea lea e ola ai foi outou." *Ioane 14:19e. (Saunia F.Sulu Samoa)*

---

## **TALANOAIALOALAFAGAMATUMUA**

### **MARIA FAAMUSAMIALE**

#### **FAATONU.**

**Aso Faraile 30 Novema 1973 –  
Aso Lulu 21 Iuni 2023. (49+6+23)**

O le faletua o le alii tiakono o lenei Ekalesia, le Afioga ia Mataia Levao Riki Faatonu; ma sa faaetiaina lo la tofi tiakono i le aso 28 Ianuari 2017. O ia o le alo tamaitai o le Susuga Peato Ale (FS) ma le faletua ia Nimoe. Sa muai galulue i laua i le EFKS Tanoaleia i Vaivase-uta i ni tausaga se tele a o lei oo mai e nofoia lo latou fanua i Nuufou nei. O upu lava a le poto o Solomona e faapea, *“O mea uma ua e iloa e ou lima, ina faia ia i lou malos; auā e leai se galuega po o se mafaufau, po o se iloa, po o se poto i le tuugamau o loo e alu atu i ai.”* Failauga 9:f10. O upu ia sa filifilia e lona toalua e faamatalaina ai le soifua auauna ma le ola tautua o lenei tina talavou i totonu o lona aiga, i lana galuega i le Malo atoa ma le Ekalesia.

O se tina o loo i ai ni meaalofā tāua a le Atua e ala i ona uiga toafilemu, o le loto maualalo ma le lē-gaioiā. E lē soona faia sana faamatalaga – pe faavavevaveina sona taofi i se mea ua ia iloaina e tatau ona faia ma faaalua ai sona manatu; a e fua faatatauina lana tofa faaalua faa-tina i le faatinoga o mea na te faia i lona poto ma le atamai ua ia mauaina mai le Atua. O le alafua lea, ma le anavatausi lea sa fai ma fuataga o soo se mea na te faia auā le manuia o lona toalua, o si a la fanau atoa ma lana auaunaga i le Lotu/Ekalesia sa o la galulue ai ma lona alii. E toa valu (8) si a la fanau – toa fitu (7) tama ma lo la alo tamaitai e toatasi (1). Sa galue i le tele o Matagaluega ma Faalapotopotoga Tumaoti a le Malo ona o ona tomai ma agavaa faapei ona ia umia ai le faailoga maualuga o le Bachelor of Commerce in Business Management & Marketing mai le Univesite Aoao a Samoa.

O lana galuega mulimuli lava, o le avea lea ma ACEO Hansard Reporting i le Ofisa o le Palemene o le Malo o Samoa. O lana tautua ma lana auaunaga lea i lenei Fono Aoao a le Malo, sa avea ma mafuaaga o le oso faafuasei ai se gasegase tau i lona fatu i le taeao o le Aso Lulu,

21 Iuni 2023 ma faanatinati atu ai lava i le Falemai i Motootua ma maliu ai lava. Talofa e, sa momoe lava ma manū a e sau mala e atia’e le soifua lelei ma le ola manuia o le fanau a le Atua. Ui i lea, e pule lava le Atua i lo outou soifua ma lo tatou ola.

O ona sauniga faa-le-aiga sa faia lea i le Aso Sa, 2 Iulai 2023 i le itula e 3:00 pm i le Maota Faasausau o Sefo Pa’u i Tafaigata lava. O Faifeau lava o laua aiga sa faatinoina lea sauniga faapitoa auā nai o latou aiga, o uo ma aumea mamae aemaise o le aufaigaluega a le Fono Aoao Faitulafono o le Malo o Samoa. O le Aso Tofi, 6 Iulai 2023, i le itula 10:00 am sa faia ai lona toe sauniga i le malumalu EFKS Nuufou, Falelauniu i Faleata nei. O au sa taitai, o lona sa folau sa molimoli mai lea i totonu o le malumalu e Siaosi Mataia (FS), Tusi Paia sa faitauina e Iamafana Faauga (FS), O tatalo sa nafa lea ma Iosefa Afutiti (FS) ma le Lauga sa saunia lea e Enefatu Lesa (FT). Sa molimau Tina Pesaleli, le tina o le galuega e faia le molimau a le Mafutaga a Tina ona o ia o se sui auai o le mafutaga.

O le afioga Mataia Levao Riki Faatonu si ona toalua, ma Faatonu Jr Faatonu lana tama sa fai ma molimau. Sa auai uma le Ofisa o le Fono Aoao Faitulafono o le Malo o Samoa, le Afioga i le Fofoga Fetalai, le Sui Fofoga Fetalai ma nisi o Afioga i Minisita o le Kapeneta, o le Failautusi Aoao atoa ma faaululuga ma le aufaigaluega uma a le Matagaluega. Sa faaii i lona toe sauniga i lona oliolisaga tumau i lo latou lava fanua, o lona aiga i Nuufou; ona matou faamavae atu lea ia te ia i le pese faatofa a le au-kerisiano – *Talofa! uso e, tofaina oe; Ua sau le itupo e malolo; E ala oe pe a mavae le po. Tofa! Tofa!* Tofa oe Sami Ale Faatonu.

**Saunia: Letaulau Aloiai Poufā Pesaleli (FS)**

**EFKS NUU FOU,**

**Matagaluega FALEATA**

**AULAGIA FETUAO TAGALOA**  
**TUITAPĀ ASAASA**  
**11/6/1952 - 25/12/2022 (70+6+15)**

Na soifua mai Fetua o i lona aiga i le afioaga o Vavau, i le Aso Lulu, 11 Iuni o le tausaga 1952. O ona tua'ā o le tamā ia Tuileto'a Tuiuli Mu Tagalao (ua maliu) - o afioaga o Saoluafata ma Vavau, ma le tina ia Talituatausa'afia Sepora Tuimaugapō-Tagalao (ua maliu), o afioaga o Falelima ma Fagafau. A e na valaau e le Atua i le Aso Kerisimasi, 25 Tesema 2022. Ua atoa ai le 70 tausaga, 6 masina ma aso e 15, o le matua o lona soifua.

**TULAGAO A'OA'OGA & GALUEGA:**

Na a'oa'oina o ia i le A'oga Tulagalua a A'ufaga, o le Aoga Faaitumalo a Lepa & Lotofaga. Ona toe fa'aaauina lea o ana a'oga i le Kolisi a le Aoga Aso Fitu i Lalovaea (SDA), ma faamanuiaina ai i le A'oga Faa-Tausi Soifua (Nursing School). Na faai'uina manuia lona taumafai, ma tautua ai i le malo ma le atunuu e ala i lana galuega faatausi soifua.

**TULAGA FA'ATAUSIAIGA:**

Sa faaipoipo atu o ia i le tamā ia Tuitapā Asaasa Talosaga i le Aso 19 o Mati i le tausaga e 1988 i le EFKS Matautu, Falealili. E toasefulu ma le tasi o lā alo, o alii e toafā ma tamaitai e toafitu. Ua maliliu alii e toalua, ua totoe mai ai le nofoaalo e to'aiva.

**TOFIGA I LE EKALEZIA:**

O le afioga ia Tuitapa ma lona faletua ia FETUAO na siitia mai lo lā tofi Tiakono mai le Matagaluega Falealili, Safata, Siumu ma galulue ai i Faleata i tua atu o le Tausaga 1986 i le aulotu lenei EFKS Ululoloa & Siusega. E o'o mai lava i le taimi nei, o i laua o nisi o tiakono matutua i lenei ekalesia. Sa avea le tina ma Failautusi a le Mafutaga a Tina EFKS Ululoloa & Siusega, ma se'e ane ai i le tofi Taitaifono i le Tausaga e 2020 seia o'o ina valaau mai lona Matai Sili i le lagi. O lana tautua faatina i le Galuega e maoa'e auā na te faamaite le tele o galuega lelei e atia'e ai le Ekalesia e ala i lo latou sao faatinā. E lototele

ma galue malosi. E loto fesoasoani ma alofa i so'o se tasi. O lana 'ote faatinā i totonu o lana aulotu e iloa ai lana galue faamatua moepō auā le sā o le Ekalesia 'aua ne'i goto ona o le faapalapala o le au galulue. O le faamaoniga o lea molimau, o Fetua o ma lona aiga sa faitaulaga i le Talalelei na te tapena le Lao'i o le Sakarameta o le Faamanatuga i ulua'i Aso Sa o masina taitasi i le tausaga atoa. Ma o lea tautua o lo'o faaaauu pea e le tamā ma le fanau e o'o mai lava i le asō.

**O ONA TOE SAUNIGA**

O ona Sauniga Faaleaiga sa faia i le Aso Gafua 02 Ianuari 2023 i le itula e 3:00 i le afiafi. Sa ou ta'ita'iina, o le Susuga i le Aoa Fesoasoani ia Ainuū Lisale Tuioti na fofogaina talosaga; a o le Susuga i le A'oa'o Malua ia Filifili Malifa na saunia le Upu Faamafanafana. O ona toe sauniga o le Aso Lulu, 04 Ianuari 2023, sa faia i le malumalu EFKS Ululoloa & Siusega i le itula e 10:00 i le taeao. Sa ou ta'ita'iina lenei sauniga, o le Susuga i le Aoa Fesoasoani o Taupaū Mika Leo sa fofogaina Afioga Paia a le Atua. O le Susuga i le alii faifeau ia Faitoaga Tolua FS, (Faatonu o le Sulu Samoa) sa saunua mo talosaga molia. Na ou tapenaina le molimau faaleagaga o le tina, ma se upu aua se feau faamafanafana mo le tamā ma le fanau, o aiga na lua aemaise o lana ekalesia e pele i lona loto.

O upu e faapea mai le Faataoto 3: se vaega o le fuaiupu 5 i le fuaiupu e 6; *“Ia e faatuatua i le Alii ma lou loto atoa, a e 'aua le faalagolago i lou lava atamai.”* O Fetua o lena i lona soifua auauna mo le Alii. O le tina sa faalagolago i le Atua, na te le'i faamoemoe i sona poto ma sona malosi; e tautua ai mo le Alii ma lana Galuega paia. Amuia lava o e ua oti, o e ua oti o i le Alii. E lē galo pea lou soifua galue ma ou uiga tausā'afia.

Ia faamaiseina le Susuga i le tamā Tiakono ia Tuitapā Asaasa Talosaga ma le nofoaalo, aemaise o aiga na lua ma lenei ekalesia. Ou te faia ai lenei molimau ma le agaga faamaualalo tele.

**Saunia Susuga Kerisimasi Sani FS**  
**EFKS Ululoloa & Siusega**  
**Matagaluega FALEATA**



# O E UA FAI I LAGI FOLAUGA

NAOMI TAUTUA AURELIO



AULAGIA FETUAO TAGALOA  
TUITAPA ASAASA



SEUMANU LOGOITUMUA  
PEISEPUSI MINERVA TAAVAO  
MATAESE

TALANOAIALOALOFAGAMATUMUA  
MARIA FAAMUSAMIA. FAATONU

